

Namminersorlutik Oqartussat Umiarsualivinnut Immikkoortunut pilersaarutaat 2017-2027-imoortoq tunngavigalugu umiarsualiviit aserfallatsaaliineqarnerinut, ineriartorteqqinnerinut ingutserneqarnerinullu pingaarnersiunermit pilersaarummik, qanorlu siunissami aserfallaatsaaliinermut aningaasartuutissanik kinguaatoorfiunnginnissaanut periarfissanik imaqartumik Naalackersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Harald Bianco, Inuit Ataqatigiit)

Akissuteqaat

(Ineqarnermut Attaveqaasersuutinullu Naalackersuisoq)

Siullermeerneqarnera

Naalackersuisut sinnerlugit siunnersuuteqartoq aalajangiiffigisassatut siunnersuuteqarnera pillugu qutsavigerusuppara. Umiarsualiveqarnermi piffissaalluarallartillugu ineriartornermi, taamatullu iluarsaassinermi aserfallatsaaliuinermilu pilersaarusiortariaqartugut tullerriaarisariaqartugullu isumaqataasorujussuuvunga. Minnerunngitsumik Namminersorlutik Oqartussat umiarsualiviutaanni aserfallatsaaliuinermi kinguaattoorutit, 2021-mi 270 mio. koruuninik naleqartut eqqarsaatigalugit.

Siunnersuuteqartoq Namminersorlutik Oqartussat umiarsualiviutaanni aserfallatsaaliuinermi, ineriartortitsinermi isaterinermilu tullerriaarinissamat pilersaarummik siunnersuuteqarpoq. Pilersaarut taanna Umiarsualivinnut Pilersaarummi pigineqareerpoq, immikkoortumullu pilersaarutip umiarsualiviit suut Namminersorlutik Oqartussat ataanniiginnassanersut, suullu tunniunneqassanersut, tunineqassanersut isaterneqassanersulluunniit pillugit pilersaarutip imarai. Tamatuma peqatigisaanik umiarsualivinnik ineriartortitsinissamat “tullerriaarinermi allattukkat 1 aamma 2” immikkoortumut pilersaarummiipput.

Tamanna oqaatigereerlugu immikkoortumut pilersaarummi tullerriaakkat anguniakkallu killiffiisa saqqummiunneqarnissaat soqutiginaateqartoq isumaqataavunga. Immikkoortumut pilersaarummi aserfallatsaaliuinermit, ineriartortitsinermit isaterinernullu tullerriaakkat, kiisalu immikkoortumut pilersaarummi tullerriaarinermi allattukkat pillugit. Tamatumunnga ilassutitut immikkoortumut pilersaarummi tullerriaakkat angunissaannut pilersaarusiortoqartariaqarpoq, tassungalu iluarsaassinermi kinguaattoorutit qanoq iliorluni ikilisinneqarnissaannut aalajangiinissaq ilaatinneqassaaq.

Siunnersuuteqartup siunnersuumminut Tasiilami talittarfiup ukiuni amerlasuuni iluarsaanneqarsimanginnera, aammalu talittarfiup imartaata ikkappallaarnera peqqutigalugu umiarsuit pilersuisut nutaaliaasut usingiartarnerminni usilersortarnerminnilu

ajornartorsiuteqarnerat tunngavilersuutigaa. Siunnersuuteqartup oqarnera malillugu ajornartorsiut tamanna illoqarfiup ineriartornissamut periarfissaanut sunniuteqarpoq.

Tasiilami umiarsualiviup salliutinneqartariaqarnera pillugu siunnersuuteqartoq isumaqatigaara. Umiarsualivinnut pilersaarummi tullerriaarinermi allattukkat 1-imi inassutigineqarpoq, Imarpik ikaarlugu umiarsuarnut talittarfiup imartaa itinerulersinneqassasoq, aammalu umiarsualiviup qanitaani qaarsup qaartiterneratigut ilioraavik allineqassasoq. Inassuteqaatit piviusunnngornissaat sulissutigissavara.

Suliniutit Naalackersuisuniit ingerlanneqarnerannut ilanngunneqarnissaat tunngavigalugu Naalackersuisut allannguutissatut siunnersuummik imaattumik saqqummiussippot:

”Naalackersuisut Umiarsualivinnut Pilersaarummut nangitsiviusumik, immikkoortumut pilersaarummi tullerriaarinerni killiffimmik saqqummiussiviusumik suliaqaqqullugit peqquneqarnissaannut Inatsisartut aalajangiiffigisassattut siunnersuut.”

Matumuuna aalajangiiffigisassatut siunnersuut Inatsisartuni kajumittumik suliassanngorlugu tunniuppara.